

四庫全書

子部

欽定四庫全書

子部

太平御覽卷一百

三十二

詳校官侍讀學士

臣沈咸熙

員外郎

臣

牛稔文覆勘

總校官降調編修

臣

倉聖脈

校對官助教

臣

胡予襄

謄錄監生

臣

吳之承

欽定四庫全書

太平御覽卷一百三十一

偏霸部十四

北齊高歡

高洋

高歡

北齊書曰高祖神武皇帝姓高氏諱歡字賀六渾渤海

宋 李昉等 撰

高澄

穆人也六世祖隱晉玄菟太守皇考樹性通率不事家業住居白道南數有赤光紫氣之異隣人以為怪勸徙居以避之皇考曰安知非吉居之自若及神武生而皇妣韓氏殂養於同產姊婿鎮獄隊尉景家神武既累世北邊故習其俗遂同鮮卑長而深沈有大度輕財重士為豪俠所宗目有精光長頭高顴齒白如玉少有人傑表家貧及聘武明皇后始有馬得給鎮為隊主鎮將遼西段長常奇神武貌謂曰君有康濟之才終不徒然便

以子孫為託神武自隊主轉為丞使嘗乘驛過建興雲霧晝晦雷聲隨之半日乃絕若有神應者每行道路往來無風塵之色又嘗夢履衆星而行覺而內喜為丞使六年每至洛陽給令史麻祥使祥嘗以肉啗神武神武性不立食坐而進之祥以為慢已答神武四十及自洛陽還傾產以結客親故怪問之答曰吾至洛陽宿衛羽林相率焚領軍張彝宅朝廷懼其亂而不問為政若此事可知也財物豈可常守邪自是乃有澄清天下之志

與懷朔省事雲中司馬子如及秀容人劉貴中山人賈顯智為奔走之友懷朔戶曹史孫騰外兵史侯景亦相友結孝昌元年歸爾朱榮先是劉貴事榮盛言神武英毅至是始得見以憔悴故未之奇也貴乃為神武更衣復求見焉因隨榮之廐廐有惡馬榮命翦之神武乃不加羈絆而翦竟不蹄齧已而起曰御惡人亦如此馬矣榮遂坐神武於床下屏左右而訪時事神武曰聞公有馬十二各色別為羣將此竟何用也榮曰但言爾意神武

曰方今天子愚弱太后淫亂孽寵擅命朝政不行以明  
公雄武乘時奮發討鄭儼徐紇而清帝側霸業可舉鞭  
而成此賀六渾之意也榮大悅語自日中至夜半乃出  
自是每參軍謀既而榮以神武為親信都督於時魏明  
帝銜鄭儼徐紇逼靈太后未敢制私使榮舉兵內向榮  
以神武為前鋒至上黨明帝又私詔停之及帝暴崩榮  
遂入洛因將篡位神武諫恐不聽請鑄像卜之鑄不成  
乃止孝莊帝立以定策勲封銅鞮伯榮嘗問左右曰一

日無我誰可主軍皆稱爾朱兆榮曰此正可統三千騎以還堪代我主衆者惟賀六渾耳因誡兆曰爾非其匹終當為其子穿鼻乃以神武為晉州刺史於是大聚斂因劉貴貨榮下要人盡得其意時州庫角無故自鳴神武異之無幾而孝莊誅榮及爾朱兆自晉陽將舉兵赴洛召神武神武使長史孫騰辭以絳蜀汾胡欲反不可委去兆恨焉騰復命神武曰兆舉兵犯上此大賊也吾不能久事之自是始有圖兆計及兆入洛執莊帝以北神

武聞之大驚又使孫騰偽賀兆因密覘孝莊所在將劫以舉義不果乃以書喻之言不宜執天子以受惡名於海內兆不納殺帝而與爾朱世隆等立長廣王曄改元建明封神武為平陽郡公魏普泰元年二月神武自領軍次信都高乾封隆之開門以待遂據冀州是月爾朱度律廢元曄而立節閔帝欲羈縻神武三月乃白節閔帝封神武為渤海王徵使入覲神武辭四月癸巳又加授東道大行臺第一鎮人酋長龐蒼鷹自太原來奔神

武以為行臺郎尋以為安州刺史神武自向山東養士繕甲禁兵侵掠百姓歸心乃詐為書云爾朱兆將以六鎮人配契胡為部曲衆皆愁怨又為并州符徵兵討步落稽發萬人將遣之孫騰尉景為請留五日如此者再神武親送之郊雪涕執別人皆號慟哭聲動地神武乃喻之曰與汝俱失鄉客義同一家不意在上乃爾徵召直向西已當死後軍期又當死配國人又當死奈何衆曰唯有反耳神武曰反是急計須推一人為主衆願

奉神武神武曰爾鄉里難制不見葛榮乎雖百萬衆無  
刑法終自灰滅今以吾為主當與前異不得欺漢兒不  
得犯軍令生死任吾則可不爾不能為取笑天下衆皆  
頓顙死生唯命神武曰若不得已明日椎牛饗士喻以  
討爾朱兆之意封隆之進曰千載一時普天幸甚神武  
曰討賊大順也拯時大業也吾雖不武以死繼之何敢  
讓焉六月庚子建義於信都乃抗表罪狀爾朱氏世隆  
等秘表不通八月爾朱兆攻陷殷州李元忠來奔孫騰

以為朝廷隔絕不權立天子則衆望無所係十月壬寅  
奉章武王融子渤海太守朗為皇帝年號中興是為廢  
帝十一月攻鄴相州刺史劉誕嬰城固守神武起土山  
為地道往建大柱一時焚之城陷入地永熙元年正月  
拔鄴城據之廢帝進神武大丞相柱國大將軍太師是  
時青州建義大都督崔靈珍大都督耿翔皆遣使歸附  
行汾州軍事劉貴棄城來降閏三月爾朱天光自長安  
兆自并州度律自洛陽仲遠自東郡同會鄴衆號二十

萬挾洹水而軍節閔以長孫承業為大行臺總督焉神武令封隆之守鄴自出頓紫陌時馬不滿二千匹兵不至三萬衆寡不敵乃於韓陵為圓陣連牛驢以塞歸道於是將士皆有死志四面赴擊之爾朱兆責神武以背已神武曰本戮力共輔王室今帝何在兆曰永安枉害天柱我報讎耳神武曰我昔日親聞天柱計汝在戶前立豈得言不反耶且以君殺臣何報之有今日義絕矣乃合戰大敗之四月斛斯椿執天光度律以送洛陽長

孫承業遣都督賈顯智張歡入洛陽執世隆彥伯斬之  
兆奔荊州仲遠奔梁州遂死焉時凶蠹既除朝廷慶悅  
既而神武至洛陽廢節閔及中興主而立孝武孝武既  
即位授神武大丞相天柱大將軍太師世襲定州刺史  
增封并前十五萬戶神武辭天柱減戶五萬壬辰還鄴  
魏帝餞於乾脯山執手而別七月壬寅神武帥師北伐  
爾朱兆封隆之言侍中斛斯椿賀拔勝賈顯智等往事  
爾朱普皆反噬今在京師寵任必構成禍隙神武深以

為然乃歸天光度律於京斬之遂自滏口入爾朱兆大掠晉陽北保秀容并州平神武以晉陽四塞乃建大丞相府而定居焉爾朱兆既至秀容分兵守險出入寇掠神武揚聲討之師出止者數四兆意怠神武揣其歲首當宴會遣竇泰以精騎馳之一日一夜行三百里神武以大軍繼之二年正月竇泰奄至爾朱兆庭軍人因宴休惰忽見泰軍驚走追破之於赤洪嶺兆自縊神武親臨厚葬之慕容紹宗以爾朱榮妻子及餘衆自保焉突

城降神武以義故待之甚厚神武之入洛也爾朱仲遠部下都督橋寧張子期自滑臺歸命神武以其助亂且數反覆皆斬之斛斯椿由是內不自安乃與南陵王寶炬及武衛將軍元毗魏光祿王思政構神武於魏帝舍人元士弼又奏神武受敕大不敬於是魏帝與神武有隙矣天平元年六月魏帝下詔罪狀神武為北伐經營神武亦勒馬宣告曰孤遇爾朱擅權舉大義於四海奉戴主上義貫幽明橫為斛斯椿讒構以誠節為逆首昔

晉趙鞅興晉陽之甲誅君側惡人今者南邁誅椿而已  
以高昂為前鋒曰若用司空言豈有今日之舉司馬子  
如答神武曰本欲立小者正為此耳魏帝徵兵關右召  
賀拔勝赴行在所遣大行臺長孫承業大都督潁川王  
斌之斛斯椿共鎮武牢七月魏帝躬率大衆屯河橋神  
武至河北十餘里再遣人口申誠款魏帝不報神武乃  
引軍渡河魏帝問計於羣臣或云南依賀拔勝或云西  
就關中或云守洛口死戰未決而王斌之與斛斯椿爭

權不睦斌之棄椿徑還給帝云神武兵至即日魏帝遜  
於長安己酉神武入洛陽止於永寧寺八月神武以萬  
機不可曠廢乃與百寮議以清河王亶為大司馬居尚  
書下舍而承制決事焉神武尋至弘農遂西剋潼關九  
月庚寅神武還至洛陽乃遣僧道榮奉表關中又不答  
乃集百寮四門耆老議所推立以為自孝昌衰亂國統  
中絕神主靡依昭穆失序遂立清河王世子善見議定  
白清河王王曰天子無父苟使兒立不惜餘生乃立之

是為孝靜帝魏於是始分為二神武以孝武既西恐逼  
峭峽洛陽復在河外接近梁境如向晉陽形勢不能相  
接乃議遷鄴護軍祖榮贊焉詔下三日車駕便發戶三  
十萬狼狽就道神武留洛陽部分事畢還晉陽自是軍  
國政務皆歸相府二年正月魏帝褒詔以神武為相國  
假黃鉞劔履上殿入朝不趨神武固辭四年十一月壬  
辰神武西討自蒲津濟衆二十萬周文軍於沙苑神武  
以地阨少却西人鼓噪而進軍大亂棄器甲十有八萬

神武跨索駝侯船以歸元象元年三月辛酉神武固請  
解丞相魏帝許之四月庚寅神武朝於鄴壬辰還晉陽  
興和元年七月丁丑魏帝進神武為相國錄尚書事固  
辭乃止十一月神武以新宮成朝於鄴魏帝與神武燕  
射武定四年八月癸巳神武將西討自鄴會兵晉陽九  
月神武圍玉壁西魏晉州刺史韋孝寬守玉壁頓軍五  
旬城不拔死者七萬人聚為一冢有星墜於神武營眾  
驢並鳴士皆驚懼神武有疾十一月庚子與疾班師庚

成遣太原公洋鎮鄴辛亥徵世子澄至晉陽有惡鳥集  
亭樹世子使斛律光射殺之己卯神武以無功表解都  
督中外諸軍事魏帝優詔許焉是時西魏言神武中弩  
神武聞之乃勉坐見諸貴使斛律金作勅勒歌神武自和  
之哀感流涕侯景素輕世子嘗謂司馬子如曰王在吾  
不敢有異王無吾不能與鮮卑小兒共事子如掩其口  
至是世子為神武書召景景不至又聞神武病遂擁兵  
自固神武謂世子曰我雖疾爾面更有餘憂色何也世

子未對又問曰豈非憂侯景叛耶曰然神武曰景專制  
河南十四年矣常有飛揚跋扈志顧我能養豈為汝駕  
御也今四方未定勿遽發哀庫狄干鮮卑老公斛律金  
勅勅老公並性道直終不負汝可朱渾道元劉豐生遠  
來投我必無異心賀拔焉過兒撲實無罪過潘樂和厚  
汝兄弟當得其力韓軌少戇宜寬借之彭樂心腹難得  
宜防護之少堪敵侯景者唯有慕容紹宗我故不貴之  
留以與汝宜深加殊禮委以經略之事五年正月朔日

蝕神武曰日蝕其為我耶死亦何恨庚午陳啟於魏帝  
是日崩於晉陽時年五十二秘不發喪天保初追崇為  
獻武帝廟號太祖

高澄

北齊書曰世祖文襄皇帝諱澄字子惠神武長子母曰  
婁太后生而岐嶷神武異之魏中興元年立為渤海王  
世子就杜詢講學敏悟過人詢甚嘆服二年加侍中開  
府儀同三司尚孝靜帝妹馮翊長公主時年十三神情

雋爽便若成人神武試問以時事得失辨折無不中理  
自是軍國籌策皆預之天平元年加使持節尚書大行  
臺并州刺史三年入輔朝政加領軍左右京畿大都督  
時人雖聞器識猶以少年期之而機略嚴明事無凝滯  
於是朝野振肅武定四年十一月神武西討不豫班師  
文襄馳赴軍所侍衛還晉陽五年正月丙午神武薨七  
月戊戌魏帝詔以文襄為使持節大丞相都督中外諸  
軍錄尚書事大行臺渤海王文襄啟辭願停王爵壬寅

魏帝詔太原公洋攝理軍國遣中使敦喻八月戊辰文  
襄啟申神武遺令請減國邑分封將督各有差辛未朝  
於鄴固辭丞相魏帝詔曰既朝野攸憑安危所繫不得  
令遂本懷須有權奪可復前大將軍餘如故七年五月  
文襄帥師赴潁川六月尅之獲西魏大將軍王思政八  
月文襄遇盜崩初梁將蘭欽子京見虜文襄以配廚欽  
求贖之不許京與其黨六人謀作亂時京將進食文襄  
却之謂人曰昨夜夢此奴殺我宜殺却京聞之置刃於

盤下冒言進食文襄怒曰我未索食何遽來京揮刀曰  
將殺汝文襄自投傷足入床下賊黨至去床遇殺時年  
二十九追諡文襄皇帝

高洋

北齊書曰顯祖文宣皇帝諱洋字子進高祖第二子世  
宗之母弟后初孕每夜有赤光照室后私嘗怪之初高  
祖之歸爾朱榮時經危亂家徒壁立后與親姻相對共  
憂寒餒帝時尚未能言欸然應曰得活太后及左右大

驚而不敢言鱗身重蹠不好戲弄深沈有大度晉陽曾有沙門乍愚乍智時人不測呼為阿禿師帝曾與諸童共見之歷問祿位至帝舉手再三指天而已口無所言見者異之高祖嘗試觀諸子意識各使治亂絲帝獨拔刀斬之曰亂者須斬高祖是之又各配兵四出而使甲騎偽攻之世宗等怖撓帝乃勒衆與彭樂敵樂免胄言情猶擒之以獻後從世宗行過遼陽山獨見天門開餘人無見者內雖明敏外若不足世宗每嗤之云此人亦

得富貴相法亦何由可解唯高祖異之天平二年授驃騎大將軍儀同三司武定元年加侍中五年授尚書令中書監京畿大都督七年八月世宗遇害事出倉卒內外震駭帝神色不變指麾部分自若嚮斬羣賊而漆其頭徐宣言曰奴反大將軍被傷無大苦也當時內外莫不驚異焉乃赴晉陽親總庶政務從寬厚事有不便者咸蠲省焉八年正月戊辰魏帝詔進帝位使持節丞相都督中外諸軍錄尚書事大行臺齊郡王食邑一萬戶

三月辛酉又進封齊王食邑十萬戶自居晉陽寢室夜  
有光如晝既為王夢人以筆點已額旦以告館客王曇  
哲曰吾其退乎曇哲再拜賀曰王上加點便成主字乃  
當進也夏五月辛亥帝如鄴甲寅進位相國總百揆加  
九錫殊禮齊王如故魏帝遣兼太尉彭城王韶奉皇帝  
璽綬禪位於帝戊午乃即皇帝位於南郊升壇柴燎告  
天事畢還宮御太極前殿詔大赦天下改武定八年為  
天保元年辛酉尊王太后為皇太后辛未遣大使於四

方觀察風俗問民疾苦嚴勒長吏厲以廉平興利除害  
務存安靜六月詔吉凶車服制度各為等差具立條式  
使儉而獲中又詔冀州之渤海長樂二郡先帝始封之  
國義旗初起之地并州之太原青州之齊郡霸業所在  
王命是基君子有作貴不忘本也申恩宜洽蠲復田租  
丁亥詔立王子殷為皇太子王后李氏為皇后八月詔  
曰有能直言正諫不避罪辜謇謇若朱雲諤諤若周舍  
開朕意沃朕心弼于一人利兼百姓者必當寵以榮祿

待以不次又曰諸牧民之官須仰承尊意勸課農桑廣收天地之利以備水旱之災庚寅詔曰朕以虛寡嗣弘王業思所以贊揚盛績播之萬古雖史官執筆有聞無墜猶恐緒言遺美時或未書在位王公文武大小降及民庶爰至僧徒或親奉音旨或承傳旁說凡可載之文籍悉宜條錄封上冬十月己卯備法駕御金輅入晉陽宮朝皇太后於內殿十一月周文帝率衆至陝城分騎北渡至建州丙寅帝親戎出次城東周文帝聞帝軍嚴

盛嘆曰高歡不死矣遂退四年征契丹帝親踰山嶺為  
士卒先露頭袒身晝夜兼行千餘里唯食肉飲水壯氣  
彌厲竟大破契丹獲畜十數萬頭七年秋自河西揔秦  
戍築長城東至於海前後所築東西凡三千餘里六十  
里一戍要害置州鎮凡二十五所八年春帝在城東馬  
射勅京城婦女悉赴觀不赴者罪以軍法七日乃止初  
於長城內築重城自庫洛拔而東四百餘里先是發丁  
匠三十餘萬營三臺於鄴下因其舊基而高博之大起

宮室及遊豫園至是三臺成改銅爵曰金鳳金獸曰聖  
應永井曰崇光十一月甲午帝登三臺御乾象殿朝讌  
羣臣并命賦詩以新宮成故也十年春正月甲寅帝如  
遼陽甘露寺二月丙戌帝於甘露寺禪居深觀唯軍國  
大政奏聞三月丙辰帝至自遼陽十月甲午帝暴崩於  
晉陽宮還京師塋武寧陵謚曰文宣皇帝廟號高祖武  
平初又改廟號顯祖帝素沈敏有遠量初文襄崩秘不  
發喪其後漸露魏帝竊謂左右曰大將軍殂此似是天

意威權當歸王室矣及帝將幸晉陽親入辭謁於昭陽殿從者千人居前持劍者十餘輩帝在殿下數十步立而衛士升階已二百許皆攘袂扣刃若對嚴敵帝令主者傳奏須詣晉陽言訖再拜而出魏帝失色目送帝曰此人似不能見容吾不知死在何日洎受禪之後留心政術御下肅清六七年以天下無事便留連飲宴通日竟夜躬自鼓舞袒露形體傅粉塗黛乘駝牛驢不施鞍勒親戚貴臣雜錯侍從徵集淫嫗分付從官親看無禮

以為戲樂貴妃薛氏甚被愛寵忽憶其經與清河王岳  
私通命支解之弄其髀以為琵琶已而對之流涕後又  
以刀子劃楊愔腹崔季舒託俳優言曰老小公子惡戲  
因掣刀子而去之又置愔於棺中載以輜車幾下釘者  
數四發丁匠三十萬人營三臺於鄴構木高二十七丈  
兩棟相去二百餘步工匠危怯皆繫繩自防帝登脊疾  
走無怖畏時復雅舞折旋中節傍人見者莫不寒心帝  
沈湎日甚妻太后舉杖擊之曰如此父生如此兒帝曰

天子母豈不知共嬖眠時即當嫁老母與胡太后大怒自此不復開顏帝免冠辭謝乃設席於地脫背就罰苦請笞脚五十因此戒酒一旬還復如初又令飛黃頭與諸國自金鳳臺各乘紙鷁以飛黃頭至紫陌乃墜於地凡所殺害或支解或火燒或投水蓋以萬數又誅元氏或父母為主或身常貴盛皆斬於東市凡七百餘人悉投屍漳水捕魚者多獲爪甲都下為之久不食魚先是帝問泰山道士曰吾得幾年為天子答曰得三十年帝

曰十年十月十日得非三十也吾甚畏之過此無慮人  
生有死又何致惜但憐兒道尚幼人將奪之耳帝及期  
而崩年三十一

太平御覽卷一百三十

欽定四庫全書

太平御覽卷一百三十一

宋 李昉等 撰

偏霸部十五

北齊高殷

高演

高湛

高緯

高殷

北齊書曰廢帝殷字正道文宣帝之長子也母曰李皇

后天保元年立為皇太子時年六歲性敏慧初學反語於跡字下注云自反時侍者未達其故太子曰跡字足傍亦為跡豈非自反耶文宣每言太子得漢家性質不似我欲廢之立太原王初詔國子博士李寶鼎傳之鼎卒復詔國子博士邢峙侍講太子雖富於春秋而溫裕開朗有人君之度貫綜經業省覽時政甚有美名七年冬文宣召朝臣文學者及禮官於東宮宴會令以經義相質親自臨聽太子手筆措問在坐莫不嘆美九年文

宣在晉陽太子監國十年十月文宣崩癸卯太子即位  
於晉陽宣德殿大赦庚戌尊皇太后為太皇太后皇后  
為皇太后乾明元年庚辰春正月癸丑朔改元己未詔  
寬徭賦癸亥高陽王浟薨車駕至自晉陽戊申以常山  
王演為大丞相都督中外諸軍錄尚書事三月甲寅詔  
軍國事皆申晉陽票大丞相常山王規卒秋八月太皇  
太后令廢帝為濟南王以大丞相常山王演入纂大統  
是日王居別宮皇建二年九月殂於晉陽時年十七諡

閔悼王

高演

北齊書曰孝昭皇帝演字延安神武皇帝第六子文宣  
皇帝之母弟也幼而英特早有大成之量武明皇太后  
早所愛重魏元象元年封常山郡公天保初進爵為王  
五年除并省尚書令帝善斷割長於文理省內畏服七  
年從文宣還鄴以尚書奏事有異同令帝與朝臣先論  
定得失然後敷奏帝長於政術剖斷咸盡其理文宣嘆

重之八年轉司空錄尚書事九年除大司馬仍錄尚書  
文宣崩帝居禁中護喪事幼主即位乃即朝班除太傅  
錄尚書事朝政皆決於帝月餘乃居藩邸自是詔勅多  
不關帝客或言於帝曰鷲鳥捨巢必有探卵之患今日  
之地何宜屢出乾明元年從廢帝赴鄴居於領軍府時  
楊愔燕子獻可朱渾天和宋欽道鄭子默等以帝威望  
既重內懼權逼請以帝為太師司州牧錄尚書事長廣  
王湛為大司馬錄并省尚書事解京畿大都督帝既以

尊親而見猜斥乃與長廣王期獵謀之於野三月甲戌  
帝初上省旦發領軍府大風暴起壞所御車幔甚惡之  
及至省朝士咸集坐定酒數行於坐執尚書令楊愔右  
僕射燕子獻領軍可朱渾天和侍中宋欽道等於坐帝  
戎服與平原王段韶平秦王高歸彥領軍劉洪徽入自  
雲龍門於中書省前遇散騎常侍鄭子默又執之同斬  
於御府之內帝至東閣門都督成休寧抽劔呵帝帝令  
高歸彥喻之休寧厲聲大呼不從歸彥既為領軍素為

兵士所服悉皆弛仗休寧方歎息而罷帝入至洛陽殿  
幼主太皇太后皇太后並出臨御坐帝奏愆等罪求伏  
專擅之辜時庭中及兩廊下衛士二千餘人皆披甲待  
詔武衛娥永樂武力絕倫又被文宣重遇撫刃思効廢  
帝性吃訥兼倉卒不知所言太皇太后又為皇太后誓  
言帝無異志唯云逼而已高歸彥勅勞衛士解嚴永樂  
乃內刃而泣帝乃令歸彥引侍衛之士向華林園以京  
畿軍入守門閤斬娥永樂於園詔以帝為大丞相都督

中外諸軍錄尚書事相府佐史進位一等帝尋入晉陽  
有詔軍國大政咸諮決焉帝既當大位知無不為擇其  
令典考綜名實廢帝恭己以聽政太皇太后尋下令廢  
少主命帝統大業皇建元年八月壬午皇帝即位於晉  
陽宣德殿大赦改乾明元年為皇建壬辰分遣大使巡  
省四方觀察風俗問人疾苦考得失搜訪賢良二年  
十一月甲辰詔曰朕嬰此暴疾奄忽無逮今嗣子沖眇  
未嫻政術社稷業重理歸上德右丞相長廣王湛研機

測化體道居宗人雄之望海內瞻仰同胞共氣家國所  
憑可遣尚書左僕射趙郡王叡喻旨徵王統茲大寶先  
是帝不豫而無闕聽覽是日崩於晉陽宮時年二十七  
大寧元年閏十二月癸卯梓宮還鄴上謚曰孝昭皇帝  
葬於文靖陵帝聰敏有識度深沈能斷不可窺測身長  
八尺腰帶十圍儀望風表迥然獨秀自居臺省留心政  
術嫻明簿領吏所不逮及正位宸居彌所剋勵輕徭薄  
賦勤恤人隱內無私寵外收人物雖后父位亦特進無

別日是臨朝務知人之善惡每訪問左右冀獲直言曾問舍人裴澤在外議論得失澤率爾對曰陛下聰明至公自可遠侔古昔而有識之士咸言傷細帝王之度頗為未弘帝笑曰誠如卿言朕初臨萬機慮不周悉故致爾耳此事安可久行恐後又嫌疎漏澤因被寵遇其樂聞過也如此趙郡王叡與庾狄顯安侍坐帝曰須拔我同堂弟顯安我親姑子今序家人禮除君臣之敬可言我之不逮顯安曰陛下多妄言曰若何對曰陛下昔見

文宣以馬鞭撻人常以為非而今行之非妄言耶帝握其手謝之又使直言對曰陛下太細天子乃更似吏帝曰朕甚知之然無法來久將整之以至無為耳又問王晞晞答如顯安皆從容受納

### 高湛

北齊書曰世祖武成皇帝諱湛神武皇帝第九子孝昭皇帝之母弟儀表瓌傑神武尤所鍾愛神武方招懷荒遠乃為帝聘蠕蠕太子菴羅辰女號隣和公主帝時年

八歲冠服端嚴神情閒遠華戎歎異元象中封長廣郡公天保初進爵為王拜尚書令尋兼司徒遷太尉乾明初楊愔等密相疎忌以帝為大司馬領并州刺史帝既與孝昭謀誅諸執政遷太傅錄尚書事領京畿大都督皇建初進位右丞相孝昭幸晉陽帝以懿親居守鄴政事咸見委託二年孝昭崩遺詔徵帝入統大位及晉陽宮發喪於崇德殿皇太后令所司宣遺詔左丞相斛律金率百寮敦勸三奏乃許之大寧元年冬十一月癸丑

皇帝即位於南宮大赦改皇建二年為大寧庚申詔大  
使巡行天下求政善惡問人疾苦擢進賢良是歲周武  
帝保定元年也河清元年春正月乙亥車駕至自晉陽  
辛巳祀南郊壬午享太廟丙戌立妃胡氏為皇后子緯  
為皇太子大赦四月乙巳青州刺史上言今月庚寅河  
濟清以河濟清改大寧二年為河清二年癸未春正月  
乙未帝詔臨朝堂策試秀才以太子少傅魏收為兼尚  
書右僕射十二月大雨雪連月南北千餘里平地數尺

霜晝下雨血於太原四年三月彗星見有物殞於殿庭如赤漆鼓帶小鈴殿上石自起兩兩相對又有神見於後園萬壽堂前山穴中具體壯大不辨其面兩齒絕白長出於脣帝直宿嬪御已下七百人咸見焉帝又夢之夏四月戊午大將軍東安王婁敵坐事免乙亥陳人來聘太史奏天文有變其占當有易主丙子乃使太宰段韶兼太尉持節奉皇帝璽綬傳位於皇太子大赦改元為天統元年百官進級降罪各有差又詔皇太子妃斛

律氏為皇后於是羣公上尊號為太上皇帝軍國大事咸以奏聞始將傳政使內參乘子尚乘駟送詔書於鄴子尚出晉陽城見人騎馬隨後忽失之尚未至鄴而其言已布矣天統四年十二月辛未太上皇帝崩於鄴宮乾壽堂時年三十二謚曰武成皇帝廟號世祖葬永平陵

高緯

北齊書曰後主諱緯字仁綱武成皇帝之長子也母曰

胡皇后夢於海上坐玉盆日入裙下遂有娠天保七年五月五日生帝於并州邸帝少美容儀武成特所愛寵拜王世子及武成入纂大業立為皇太子河清四年武成禪位於帝天統元年乙酉夏四月丙子皇帝即位於晉陽宮大赦改河清四年為天統三年二月壬寅朔帝加元服大赦四年秋周人來通和太上皇帝詔侍中斛斯文略報聘於周十二月辛未太上皇帝崩武平三年二月侍中祖珽為左僕射是月敕撰玄洲苑御覽後改

名聖壽堂御覽三月辛酉詔文武官五品已上各舉一人秋七月戊辰誅左丞相咸陽王斛律光及其弟幽州行臺荊山公豐樂八月庚寅廢皇后斛律氏為庶人是月聖壽堂御覽成敕付史閣後改為修文殿御覽六年八月周師入洛川屯芒山攻逼洛城縱火船焚浮橋河橋絕閏月己丑遣右丞相高阿那肱自晉陽禦之師次河陽周師夜遁七年冬十月帝大狩於祁連池周師攻晉州癸亥帝還晉陽甲子出兵大集晉陽庚午帝發晉

陽列陣而行上雞栖原與周齊王憲相對至夜不戰周  
師斂陣而退十一月周武帝退還長安留偏師守晉州  
高阿那肱等圍其城戊寅帝至圍所十二月戊申周武  
帝來救晉州庚戌戰於城南齊軍大敗帝棄軍先還癸  
丑入晉陽憂懼不知所之甲寅大赦帝謂朝臣曰周師甚  
盛若何羣臣咸曰天命未改一得一失自古皆然宜停  
百賦安朝野收遺兵背城死戰以存社稷帝意猶豫欲  
向北朔州乃留安德王延宗廣寧王孝珩等守晉陽若

晉陽不守即欲奔突厥羣臣皆曰不可帝不從其言開府儀同三司賀拔伏恩封輔相慕容鍾葵等與宿衛近臣三十餘人西奔周師乙卯詔募兵遣安德王延宗為左廣寧王孝珩為右延宗入見帝告欲向北朔州延宗泣諫不從帝密遣王康德與中人齊紹等送皇太后皇太子於北朔州丙辰帝幸城南軍勞將士其夜欲遁諸將不從丁巳大赦改武平七年為隆化元年其日穆提婆降周詔除安德王延宗為相國委以備禦延宗流涕受

命帝乃夜斬五龍門而出欲走突厥從官多散領軍梅  
勝郎扣馬諫乃迴之鄴唯高阿那肱等十餘騎廣寧王  
孝珣襄城王彥道續至得數十人同行戊午延宗從衆  
議即皇帝位於晉陽改隆化為德昌元年庚申帝入鄴  
辛酉延宗與周師戰於晉陽大敗為周師所虜帝遣募  
人重加官賞雖有此言而竟不出物廣寧王孝珣奏請  
出宮人及珍寶班賜將士帝不悅斛律孝卿居中受委  
帶甲以處分請帝親勞軍為帝撰辭且曰宜慷慨流涕

感激人心帝既出臨衆將令之不復記所受言遂大笑  
左右亦羣咤將士莫不解體於是自大丞相已下太宰  
三師大司馬大將軍三公等官並增員而授或三或四  
不可勝數甲子皇太后從北道至引文武一品已上入  
朱華門賜酒食及紙筆問以禦周之方略羣臣各異議  
帝莫知所從又引高元海宋士素盧思道李德林等欲  
議禪位皇太子先是望氣者言當有革易於是依天統  
故事傳位幼主帝自稱太上皇幼主名恒帝之長子也

母曰穆皇后武平元年六月生於鄴其年十月立為皇太子隆化二年正月乙亥即皇帝位時年八歲改元為承光元年大赦於是黃門侍郎顏之推中書侍郎薛道衡侍中陳德信等勸太上皇往河外募兵更為經略若不濟南投陳國從之丁丑太上皇太后太上皇自鄴先趨濟州周師漸逼癸未幼主又自鄴東走己丑周師至紫陌橋癸巳燒城西門太上皇將百餘騎東走乙亥渡河入濟州其日幼主禪位於大丞相任城王潛令侍中斛

律孝卿送禪文及璽綬於瀛州孝卿乃以之歸周又為  
任城王詔尊太上皇為無上皇幼主為守國天王留太  
后於濟州遣高阿那肱留守太上皇并皇后攜幼主走  
青州韓長鸞鄧顓等數十人從太上皇既至青州即為  
入陳之計而高阿那肱召周軍約生致齊主而屢使人  
告言賊軍在遠已令人燒斷橋路太上所以停緩周軍  
奄至青州太上窘急將遜於陳置金囊於鞍後與長鸞  
淑妃等數十騎至青州南鄧村為周將尉遲剛所獲送

鄴周武帝與抗賓主禮并太后幼主諸王俱送長安封  
帝溫國公在位凡一十三年帝素昏亂加之暴虐崔季  
舒斛律光等皆以直見殺帝好自彈琵琶而唱無愁曲  
每處深宮羞見朝士三日一臨小殿啟事者走如飄風  
頭著於胷不得平視凡諸犬馬皆有儀同郡君之號又  
於宮中立貧窮村舍帝自弊衣為乞兒每好不急之求  
一夜索蠋及曉得三升置之浴斛使人裸卧斛中觀其  
號叫宛轉而為笑樂又賣官爵各分州郡下至鄉官皆

降中旨於是州縣官人多出富商大賈競為貪縱人不  
聊生以至於敗也初武成夢大蜚攻破鄴城乃悉索境  
內蜚膏以絕之議者以帝之名聲與蜚相協亡齊之徵  
也

太平御覽卷一百三十一

欽定四庫全書

太平御覽卷一百三十二

宋 李昉等 撰

偏霸部十五

梁蕭衍

蕭綱

蕭繹

侯景 附

蕭衍

梁書曰高祖武皇帝諱衍字叔達小字練兒蘭陵中都

里人漢相國何之後也皇考諱順之齊高帝族弟也參預佐命封臨湘縣侯高祖以宋大明八年生於秣陵同夏里三橋宅生而有奇異兩髀駢骨頂上隆起有文在右手曰武帝及長博學多通好籌略有文武才幹時流名輩咸推許焉所居室常若雲氣人或遇者體輒肅然起家巴陵王南中郎法曹遷衛將軍王儉東閣祭酒儉一見深相器異謂廬江何憲曰此蕭郎三十內當作侍中出此則貴不可言竟陵王子良開西邸招文學高祖

與沈約謝朓王融等並遊焉隆昌初明帝輔政起高祖  
為寧朔將軍鎮壽春除太子庶子給事黃門侍郎入直  
殿省預蕭湛等定策勲封建陽縣男邑三百戶建武二  
年魏遣將劉昶王肅帥衆寇司州高祖為冠軍將軍帥  
所領自外進戰魏軍表裏受敵乃棄圍退走軍罷以高  
祖為右軍晉安王司馬淮陵太守還為太子中庶子領  
軍羽林監頃之出鎮石頭四年魏帝自率大衆寇雍州  
明帝令高祖赴援又遣崔惠景督諸軍高祖等並受節

度明年三月惠景與高祖進行鄧城魏主率十萬餘騎奄至惠景軍死傷略盡唯高祖全師而歸俄以高祖行雍州府事明帝崩東昏即位始安王遙光徐孝嗣江祀更直內省分日帖敕高祖聞之謂從舅張弘策曰政出多門亂其階矣時高祖長兄懿罷益州還仍行郢州事乃使弘策詣郢陳計於懿曰若隙開釁起必中外土崩今得守外藩幸圖身計郢州控帶荆湘西注漢沔雍州士馬呼吸數萬虎視其間以觀天下此蓋萬全之策如

不早圖悔無及也懿聞之色變心不之許弘策還是歲  
至襄陽於是潛造器械多伐竹木沈於檀溪密為舟裝  
之備二年冬懿被害信至高祖密召長史王茂中兵呂  
僧珍等謀之以十一月召僚佐集於廳事謂之曰昔武  
王會孟津皆曰紂可伐今昏主惡稔窮虐極暴誅戮朝  
賢罕有遺育生人塗炭天命殛之卿等同心疾惡共興  
義舉公侯將相良在茲日各盡勲效我不食言是日建  
牙於是收集得甲士萬餘人馬千餘匹船三百艘出檀

溪竹木裝艦東昏以劉山陽為巴陵太守配精兵三千  
使過荊州就行事蕭穎胄以襲襄陽穎胄伏兵斬之送  
首於高祖仍以南康王尊號之議來告且曰時月未利  
當須來年二月遽便進兵恐非廟算高祖答曰所藉義  
心一時驍銳事事相接猶恐疑怠天時人謀有何不利  
處分已定安可中息三年二月南康王為相國以高祖  
為征東將軍高祖發襄陽移檄京邑高祖至竟陵命長  
史王茂與太守曹景宗為前軍輕兵濟江逼郢城張沖

出軍迎戰茂等邀擊大破之三月南康王即帝位於江陵改永元三年為中興元年遷廢東昏為涪陵王以高祖為尚書左僕射加征東大將軍都督征討諸軍事假黃鉞五月東昏遣寧朔將軍吳子揚等救郢州六月子陽進據加湖去郢三十里傍山帶水築壘以自固七月高祖命王茂潛師襲加湖俄而大潰子陽竄走衆盡溺於江王茂虜其餘而還郢城主程茂以城降高祖又遣軍主唐修期攻隨郡並尅之司州刺史王僧景遣子入

質司部悉平八月天子遣黃門勞軍九月詔高祖平定東夏並以便宜從事是月豫州刺史申胄棄姑熟走大軍進據之遣曹景宗蕭穎達領馬步進頓江寧東昏遣李居士率步軍迎戰景宗擊走之大軍次新林命王茂進據越城曹景宗據皂莢橋十月東昏又遣征虜將軍王珍國等列陣於航南大路精手利器尚萬人閭人王張子持白虎幡督率諸軍王茂曹景宗等犄角奔之鼓噪震天地珍國之衆一時土崩諸軍望之皆潰茂軍追

至宣陽門李居士以新亭壘徐元瑜以東府城降石頭  
白下諸軍並宵潰高祖鎮石頭命衆軍圍六門東昏悉  
焚燒門內驅逼營署官府並入城有衆二十萬青州刺  
史桓和紿東昏出戰因以衆來降高祖令諸軍築長圍  
十二月衛尉張稷北徐州刺史王珍國斬東昏送首茂  
師高祖命呂僧珍勒兵封府庫及圖籍收嬖妾潘淑妃  
及凶黨王咥之以下四十八人屬吏誅之宣德皇后令追  
廢涪陵王為東昏侯依漢海昏侯故事授高祖中書監

都督楊徐二州諸軍事大司馬錄尚書驃騎大將軍揚州刺史封建安郡公食邑萬戶給班劍四十人黃鉞侍中征討諸軍事並如故高祖入屯閱武堂下令大赦二年天子遣慰勞京邑追贈高祖祖散騎常侍左光祿大夫考侍中丞相宣德皇后臨朝入居內殿詔進高祖都督中外諸軍事劍履上殿入朝不趨贊拜不名加前後部羽葆鼓吹置左右長史司馬從事中郎掾屬各四人又詔進位相國總百揆揚州刺史封十郡為梁公備九

錫之禮高祖固辭二月進梁公爵為王以豫州之南譙  
廬江等十郡益梁國并前為二十郡三月命王冕十有  
二旒建天子旌旗出警入蹕庚辰齊帝禪位於梁高祖  
謙讓不受太史令蔣道秀陳天文符讖六十四條事並  
明著羣臣固請乃從之夏四月丙寅高祖即皇帝位於  
南郊設壇柴燎告類於天大赦改齊中興二年為天監  
元年封齊帝為巴陵王八月詔中書監王瑩等八人參  
定律令十一月立皇子統為皇太子四年正月詔九流

常選年未三十不通一經不得解褐若有才同甘顏勿  
限年次是歲大穰米斛三十五年三月魏宣武帝從弟  
翼率其諸弟來降陳伯之自壽陽率衆歸降八年正月  
輿駕親祠南郊赦天下九年三月幸國子學親臨講肆  
詔皇太子及王侯之子年在從師者可令入學十年親  
祠南郊大赦三月鄧昕以胸山引魏軍遣振遠將軍馬  
仙琕討之十月馬仙琕大破魏軍斬馘十餘萬復尅胸  
山城十八年親祠南郊普通元年正月改元大赦五年

六月龍闕於曲阿王陂因西行至建陵城所經樹木倒折七年赦死罪已下大通元年三月幸同泰寺捨身甲戌還宮赦天下改元二年十月以魏北海王元顥為魏主遣東宮直閣將軍陳慶之衛送還北魏豫州刺史鄧獻以地內屬中大通元年九月幸同泰寺捨身公卿以下以錢一億萬奉贖十月輿駕還宮大赦改元三年十月幸同泰寺升法座為四部衆說大般若涅槃經義六年春親耕藉田四月熒惑在南斗大同元年正月改元

大赦二年三月詔文武在位舉爾所知公侯將相隨才擢用十年三月幸蘭陵謁建寧陵十一年四月魏遣使來聘中大同元年四月於同泰寺講說法會大赦改元十月以前東揚州刺史岳陽王詵為雍州刺史太清元年二月魏司徒侯景以豫章廣潁洛陽等十三州內屬以景為大將軍封河南大行臺承制如鄧禹故事四月大赦改元八月以大將軍侯景錄行臺尚書事二年八月侯景舉兵反十月景自橫江濟於采石景師至京臨

賀王正德率衆附賊十一月攻陷東府城三年三月前  
司州刺史羊鴉仁等進軍東府北與賊戰大敗賊攻陷  
宮城縱兵大掠侯景自為都督中外諸軍事大丞相錄  
尚書四月高祖以所求不供憂憤寢疾五月丙辰崩於  
淨居殿時年八十六十一月進尊為武皇帝廟號高祖  
葬於脩陵

梁書曰高祖生知淳孝少而篤學洞達儒玄雖萬機多  
務猶卷不輟手後宮職司貴妃已下皆衣不曳地傍無

錦綺不飲酒不聽音樂歷觀古昔帝王人君恭儉莊敬  
藝能博學罕或有焉

蕭綱

梁書曰太宗簡文皇帝諱綱字世讚小字六通高祖第  
三子天監五年封晉安王中大通三年四月昭明太子  
薨五月立為皇太子太清三年五月高祖崩即皇帝位  
大寶元年正月大赦改元西魏寇安陸執司州刺史柳  
仲禮盡沒漢東之地二月邵陵王綸自尋陽至於夏口

郢州刺史南平王恪以州讓綸侯景逼帝幸西州夏大  
饑人相食京師尤甚前司州刺史羊鴉仁自尚書省出  
奔西州八月湘東王繹遣領軍將軍王僧辯率衆逼郢  
州侯景自進位相國封二十郡為漢王邵陵王綸棄郢  
州走十月侯景自加宇宙大將軍都督六合諸軍事二  
年三月侯景自率衆西寇自石頭至新林舳舻相接四  
月景分遣偽將宋子仙任約襲郢州閏月景進寇巴陵  
王僧辯連戰不能尅五月湘東王遣遊擊將軍胡僧祐

信州刺史陸法和援巴陵景遣任約帥衆拒援軍六月  
僧祐等擊破任約擒之景解圍宵遁王僧辯督衆軍追  
景攻魯山城尅之七月景還至京師王僧辯軍次湓城  
八月侯景遣衛尉卿彭儁率兵入殿廢帝為晉安王幽  
於永福省害皇太子大器尋陽王大心及尋陽王諸子  
二十人矯詔禪於豫章嗣王棟大赦改元十月帝崩永  
福省時年四十九賊偽諡曰明皇帝廟稱高宗明年三  
月王僧辯率百官奉梓宮升朝堂世祖追宗為簡文皇

帝廟曰太宗塋莊陵

梁書曰太宗見幽繫題壁自序云有梁正士蘭陵蕭世讚立身行道終始如一風雨如晦雞鳴不已弗欺暗室豈淹三光數至於此命也如何又為連珠二首文甚悽愴

蕭繹

梁書曰世祖孝元皇帝諱繹字世誠小字七符高祖第七子也天監十三年封湘東郡王大同六年出為都督

江州諸軍事江州刺史太清元年徙為都督荆雍湘司  
郢等九州諸軍事鎮西將軍荊州刺史三年三月侯景  
寇沒京師太子舍人蕭歆至江陵宣密詔以世祖為侍  
中假黃鉞大都督中外諸軍事司徒承制餘如故是月  
世祖徵兵於湘州湘州刺史河東王譽拒而不遣七月  
遣世子方等帥衆討譽戰敗又遣將軍鮑泉討譽九月  
雍州刺史岳陽王譽舉兵反來寇江陵世祖嬰城拒守  
營將杜蒨及楊混各率其衆來降營遁走鮑泉攻湘州

不尅又遣左衛將軍王僧辯伐之大寶元年五月王僧  
辯尅湘州斬河東王譽湘州平二年二月魏遣使來聘  
三月侯景悉兵西上會任約軍王僧辯率衆屯巴陵景  
進寇巴陵世祖遣將軍胡僧祐陸法和帥衆下援巴陵  
任約敗景遂遁走僧辯帥衆軍追景所至皆捷八月僧  
辯下次湓城十月王僧辯奉表稱侯景弑逆皇帝賊害  
太子宗室在寇庭者並罹禍酷世祖奉諱大臨三日百  
官縞素司空南平王恪率宗室將軍胡僧祐率羣僚並

奉敕勸進世祖固讓三年二月王僧辯衆軍發自尋陽  
世祖馳檄告四方有能縛侯景及送首者封萬戶開國  
公三月王僧辯等平侯景傳其首於江陵告明堂大社  
四月益州刺史新除假黃鉞太尉武陵王紀竊位於蜀  
改號天正元年世祖遣司空蕭太謁瑩陵修復社廟五  
月以尚書令征東將軍江州刺史王僧辯為司徒斬賊  
左僕射王偉尚書呂季略於江陵市是月魏遣太師潘  
洛辛等寇秦郡王僧辯遣杜顗帥衆拒之以陳霸先為

征北大將軍南徐州刺史是月魏遣使賀平侯景八月  
蕭紀率巴蜀大衆東下遣護軍陸法和屯巴峽以拒之  
十月四方征鎮王公卿士復勸世祖即尊號表三上乃  
從之承聖元年十一月丙子即皇帝位於江陵立王太  
子方矩為皇太子追尊所生妣阮修容為文宣太后二  
年西魏遣大將尉遲迥襲益州三年以郢州刺史陸法  
和為司徒四月以征北大將軍陳霸先為司空九月魏  
遣其柱國萬紐于瑾率大衆來寇冬十月魏軍至於襄

陽蕭譽率衆會之內外戒嚴輿駕出行都柵徵王僧辯等軍十一月魏軍至柵下徵廣州刺史王琳入援辛卯魏軍大攻世祖出柵杷門親臨陣督戰六軍敗績反者斬西門關以納魏師城陷於西魏世祖見執十二月西魏害世祖遂崩焉時年四十七太子皆見害明年四月追尊為孝元皇帝廟曰世祖

梁書曰世祖聰悟俊朗天才英發年五六歲高祖問汝讀何書對曰能誦曲禮高祖曰汝試言之即誦上篇左

右莫不驚歎既長好學博總羣書下筆成章出言為論  
才辯敏速冠絕一時也

侯景附

梁書曰侯景河朔人也少不羈高歡以為將軍雄勇冠時征伐  
數有大功嘗謂歡曰若假景三萬人當橫行天下要須  
縛取蕭衍老翁遣作太平寺主後高歡死景乃以河南  
降於梁高澄使慕容紹宗軍圍長社景謂紹宗曰欲送  
客耶將定雄雌耶紹宗曰吾將決戰景乃令將士皆披

甲持短刀但低視砍人脛足遂敗紹宗軍裨將斛律光死之紹宗曰吾戰多矣未見此賊之難相持連月景食待盡其將暴顯等降紹宗景衆乃潰景與心腹數騎濟淮稍收散卒得馬步八百人晝夜兼行追軍不敢逼使謂紹宗曰景若就擒公復何用紹宗乃縱之遂攻壽陽下之而據其城梁武以為河南王招集戰士乃請絹萬疋為軍人作袍帝不與以青布給之又請娶於王謝武帝曰王謝門高非其偶可朱張已下訪之景恚曰會將

胡兒女以配奴景既為朝廷所疑武帝使謂景曰譬如貧家畜十客尚能得志朕惟有一客致有怨言是朕之失也明日遂將兵於厯陽濟江聞郢陵王綸督衆軍景乃謀於王偉偉曰莫若直掩京都臨賀反於內大王攻於外天下不足定也兵法曰巧遲不如拙速今便須進路不然郢陵及矣景遂晨夜兼行至都百道攻城縱火焚諸城門城中倉卒未有備乃鑿門樓下水沃火久之方滅景又於城西各起土山以臨城內內亦作兩土山

以應之簡文以下皆親執畚鍤景又募有先為奴者賞  
以不次朱屏家黥奴踰城投賊景以為儀同使至闕下  
以誘城內乘馬披錦袍詔曰朱屏五十年仕宦方得中  
領軍我始事侯王已為儀同使於是奴僮競出盡皆得  
志景決石闕前水百道攻城晝夜不息城陷景自為丞  
相以甲士五百人自衛帶劔升殿帝謂景曰卿久在戎  
得無勞乎景不對帝曰卿是何州人而至此又默然左  
右任約代對及出景謂約曰吾嘗據鞍對敵矢刃交下

而意無怖今見蕭公使人自冒豈非天威難犯吾不可以再見之矣先是城中積屍不暇埋瘞又有已死未斂或將死未絕景悉命聚而焚之尚書郎鮑正疾篤賊曳出而焚之宛轉火中久而方絕武帝崩立簡文又立豫章王景皆殺之遂篡位國號漢年稱太始王偉請立七廟景問何謂七廟偉曰古者天子祭七代祖考故致七廟并請七代諱敕太常具祭祀之禮景曰前代吾不復憶惟記得阿爺名大標且在朔州伊那得來噉衆聞咸

笑景頻為王僧辯所破將走王偉按劔諫曰自古豈有走天子今宮中衛士尚可一戰寧可便走景曰我在北時打賀拔勝破葛榮揚名河朔與高王一種人今來直渡大江取臺城如反掌打邵陵王於北山推柳仲禮於南岸皆爾所親見也今日之事恐是天亡爾好守城吾當一決乃與百騎東走至松江乃與腹心數十人乘舸入海至湖州舍人羊鯤殺景景左足上有肉瘤狀似龜戰勝應尅捷則隱起分明如不勝則低是日瘤陷肉中

遂傳首於江陵



太平御覽卷一百三十二

欽定四庫全書

子部

太平御覽卷一百三十三  
五

詳校官侍讀學士臣沈威熙

員外郎臣牛稔文覆勘

總校官降調編修臣倉聖脈

校對官助教臣胡予襄

謄錄監生臣吳之承

欽定四庫全書

太平御覽卷一百三十三

偏霸部十七

梁蕭方智

後梁蕭答

蕭琮

陳陳霸先

宋 李昉等 撰

蕭歸

梁肅方智

梁書曰敬帝諱方智字慧相小字法真世祖第九子也太清三年封興梁侯承聖元年封晉安郡王二年出為平南將軍江州刺史三年十一月江陵陷太尉揚州刺史王僧辯司空南徐州刺史陳霸先定議以帝為太宰承制奉迎還京師四年二月至自尋陽入居朝堂以太尉王僧辯為中書監錄尚書驃騎將軍都督中外諸軍事加司空陳霸先班劍二十人三月齊遣其上黨王高

渙送貞陽侯蕭淵明來至東關帝遣吳興太守裴之橫  
與戰敗績之橫死王僧辯率衆出屯姑熟七月王僧辯  
納貞陽侯蕭淵明自采石濟江入於京師以帝為皇太  
子九月司空陳霸先舉義兵襲殺王僧辯黜蕭淵明丙  
午帝即皇帝位十月詔改承聖四年為紹泰元年大赦  
以貞陽侯淵明為司徒封建安郡公以司空陳霸先為  
尚書令尊母夏貴妃為皇太后立妃王氏為皇后太平  
元年正月大赦四月齊軍水步入丹陽縣至秣陵故治

六月齊潛軍至蔣山北至玄武湖司空陳霸先授衆軍節度大破之七月陳霸先進位司徒九月改元大赦除司徒陳霸先為丞相錄尚書事二年四月齊遣使請和八月加丞相黃鉞領太傅劔履上殿九月為相國總百揆封十郡為陳公備九錫之禮十月禪位於陳奉帝為江陰王薨於外邸時年十六追謚敬皇帝史臣曰梁季橫潰喪亂屢臻當此之時天厯去矣敬皇高讓將同釋負焉

後梁蕭詧

梁書曰後梁宣帝諱詧昭明太子第三子也封岳陽王授雍州刺史孝元被西魏所害詧遂為魏附庸稱大定元年以蔡大寶為相時人比昭烈遇孔明詧性不好酒尤惡見婦人酷信佛法謂尚書宋如周曰卿何謗經如周跣躅自陳懼而出以告大寶寶曰卿當不謗餘經不信法華耳如周乃悟經云隨喜面不狹長如周面狹且長故戲之耳詧居處殘毀干戈日用在位八年憤惋而殂年四

十子歸立

蕭歸

梁書曰明帝諱歸宣帝第三子也聰明有器識大定元年為太子宣帝崩太子即位號天保元年十五年周武帝平北齊得傳國璽歸入周賀武帝大會羣臣及諸藩客周武自彈琵琶令故齊主高緯起舞達摩及故安德王延宗悲不自勝緯舞訖勸歸歸乃起舞周武曰梁主乃能為朕舞乎歸曰陛下既自彈五絃臣何敢不同百獸周武

大悅周武指齊氏故臣北列長艾謂歸曰是登陴罵朕  
者歸曰長艾未能抱樂翻敢吠堯周武大笑初雖禮接  
歸未深知之至是歸承間乃陳父荷太祖拯救之恩并  
敘二國艱虞唇齒犄角之事辭理辯暢因涕泗交流周  
武亦為歔歔自是禮遇日深賜雜繒百段馬五匹并賜  
齊宮伎女遣歸國執歸手曰待破突厥必送梁王歸江  
東歸途經古跡莫不駐馬賦詩以敘其懷至於江陵凡  
三十首女為秦晉王廣妃在位十四年而殂

蕭琮

梁書琮明帝太子也既立赦其封內改元寬運琮性廣仁有大度博學有文義兼善弓馬明年隋文徵琮入朝琮率其臣二百餘人朝於長安羣臣辭於送客堂琮下馬執別莫不殞涕既至隋文帝留之使崔弘度將兵攻江陵江陵不守於是國廢

陳陳霸先

陳書曰高祖武皇帝諱霸先字興國小字法生吳興長

城下若里人漢太丘長陳寔之後也世居潁川寔玄孫  
準晉太尉準生匡匡生達永嘉南遷為丞相掾歷太子  
洗馬出為長城令悅其山水遂家焉嘗謂所親曰此地  
山川秀麗當有王者興二百年後我子孫必鍾斯運高  
祖以梁天監二年癸未歲生少儻有大志不治生產  
既長讀兵書多武藝明達果斷為當時所推服嘗遊義  
興館於許氏夜夢天開數丈有四人朱衣捧日而至今  
高祖開口納焉及覺腹中猶熱高祖心獨負之大同初

新喻侯蕭暎為吳興太守甚重高祖謂僚佐曰此人方將遠大及暎為廣州刺史高祖為中兵參軍隨之鎮暎令高祖招集士馬衆至千人仍命高祖監宋隆郡所部安化二縣軍反高祖討平之尋監西江督護高安郡守先是武林侯蕭諮為交州刺史以苛刻失衆心土人李賁連結數州豪傑同時反臺遣高州刺史孫罔新州刺史盧子雄將兵擊之罔等不時而進皆於廣州伏誅子雄弟子略與罔子致及其主帥杜天合杜僧明共舉兵

執江南督護沈顗進寇廣州晝夜苦攻州中震恐高祖率精兵三千卷甲兼行以救之頻戰屢捷天合中流矢死賊衆大潰僧明遂降梁武帝深歎異焉授直閣將軍封新安子邑三百戶仍遣畫工圖其像高祖送喪還都至大庾嶺會有詔高祖為交州司馬領武平太守與刺史楊暕南討十一年六月軍至交州賁衆數萬於蘇厯江口立城柵以拒官軍暕推高祖為前鋒所向摧陷賁走典徹湖於屈獠界立砦大造船艦充塞湖中衆軍憚

之頓湖口不敢進夜江水暴起七丈注湖中奔流迅激  
高祖勒所部兵乘流先進衆軍鼓噪俱前賊衆大潰賁  
竄入屈獠洞中屈獠斬賁傳首京師是歲太清元年也  
除振遠將軍江西督護高安太守督七郡諸軍事二年  
冬侯景寇京師高祖將率兵赴援廣州刺史元景仲陰  
有異志將圖高祖高祖知其計與成州刺史王懷明行  
臺選郎殷外臣等密議戒嚴三年七月集義兵於南海  
馳檄以討景仲景仲窮蹙縊於閣下高祖迎蕭勃鎮廣

州十一月高祖遣杜僧明胡穎將二千人頓於嶺上并  
厚結始興豪傑同謀義舉侯安都張憺等率千餘人來  
附蕭勃聞之遣鍾休悅說高祖曰侯景驍勇天下無敵  
前者授軍十萬士馬精強然而莫敢當鋒遂令羯賊得  
志以君疎外詎可暗投未若且住始興遙張聲勢保此  
泰山自求多福高祖泣謂休悅曰僕本庸虛蒙國成造  
往聞侯景渡江即欲赴援今京都覆沒主上蒙塵君辱  
臣死誰敢愛命君侯體則皇枝任崇方岳不能推鋒萬

里雪此寃痛見遣一軍猶賢乎已乃降後旨使人慨然  
僕行計決矣憑為披述乃遣使間道往江陵稟承軍期  
節度湘東王承制授高祖員外散騎常侍持節明威將  
軍交州刺史改封南野縣伯六月高祖修嶂頭古城徙  
居焉高州刺史李廷仕據大皐遣主帥杜平虜率千人  
入贛石魚梁高祖命周文育將兵擊走之廷仕奔寧都  
承制授高祖通直散騎常侍使持節信威將軍豫州刺  
史領豫章內史改封長城縣侯尋授散騎常侍使持節

都督六郡諸軍事師將軍南江州刺史餘如故時寧都人劉藹等資廷仕舟艦兵仗將襲南康高祖遣杜僧明等率二萬人據白口築城以禦之廷仕亦立城以相對二年二月僧明等攻拔其城生擒廷仕送南康高祖斬之承制命高祖進兵定江州仍授江州刺史餘如故六月高祖發自南康觀者數萬人是時承制遣征東將軍王僧辯督衆軍討侯景八月僧辯軍次湓城高祖率杜僧明等衆軍及南川豪帥合三萬人將會焉時西軍乏

食高祖先貯軍糧五十萬石至是分三十萬以資之仍  
頓巴丘會侯景廢簡文帝立豫章嗣王棟高祖遣兼長  
史沈袞奉表於江陵勸進十一月承制授高祖使持節  
都督會稽東陽新安臨海永嘉五郡諸軍事平東將軍  
揚州刺史領會稽太守豫章內史餘並如故三年正月  
高祖率甲士三萬人强弩五千張舟艦二十束發自豫  
章二月次桑落洲遣中記室參軍江元禮以事表江陵  
承制加高祖鼓吹一部是時僧辯已發湓城會高祖於

白茅灣乃登岸結壇刑牲盟約進軍次蕪湖侯景棄城走三月高祖與諸軍進尅姑熟仍次蔡州侯景登石頭城觀望形勢意甚不悅謂左右曰此軍上有紫氣不易可當乃以船艘貯石沈塞淮口緣淮作城自石頭迄青溪十餘里中樓雉相接諸將未有所決僧辯遣杜蒧問計於高祖高祖曰前柳仲禮數十萬兵隔水而坐韋粲之在青溪竟不渡岸賊乃登高望之表裏俱盡肆其凶虐覆我王師今圍石頭須渡北岸諸將若不能當鋒請

先往立柵高祖即於石頭西橫隴築柵衆軍次連八城  
直出東北賊恐西州路斷亦於東北果林作五城以遏  
大路景率衆萬餘人鐵騎八百餘匹結陣而進乃命諸  
將分處置兵賊直衝王僧志僧志小縮高祖遣徐度領  
弩手二千橫截其後賊乃却高祖與王琳杜龕等以鐵  
騎悉力乘之賊退據其柵景儀同盧輝略開石頭北門  
來降戴晃曹宣等攻破果林一城衆軍又尅其四城賊  
復還殊死戰又盡奪所得城柵高祖大怒親率攻之士

卒騰柵而入賊復散走景與百餘騎棄稍執刀左右衝陣陣不動景衆大潰遂北至西明門景至闕下不敢入臺遣腹心取其二子而遁高祖率衆出廣陵應接會景將郭元建奔齊高祖納其部曲三千人而還僧辯啓高祖鎮京口五月齊遣辛術圍嚴超達於秦郡高祖命徐度領兵助其固守齊衆七萬填塹起土山穿地道攻之甚急高祖乃自率萬人解其圍縱兵四面擊齊軍弓弩亂發齊平秦王中流矢死斬首數百級齊人收兵退高

祖振旅南歸遣記室參軍劉本仁獻捷於江陵承制授  
高祖使持節散騎常侍都督南徐州諸軍事征北大將  
軍開府儀同三司南徐州刺史餘並如故及王僧辯率  
衆征陸納於湘州承制命高祖代鎮揚州十一月湘東  
王即位於江陵改承聖元年明年湘州平高祖旋鎮京  
口三年三月進高祖司空餘如故十一月西魏攻陷江  
陵高祖與王僧辯等進啟江州請晉安王以太宰承制  
又遣長史謝哲奉牋勸進十二月晉安王至自尋陽入

居朝堂給高祖班劍二十人四年五月齊送貞陽侯淵  
明還主社稷王僧辯納之即位改元曰天成以晉安王  
為皇太子初齊之請納貞陽侯也高祖以為不可遣使  
詣僧辯苦爭之往返數四僧辯竟不從高祖居常憤恨  
密謂所親曰武帝雖磐石之宗遠播四海至於剋雪讎  
恥寧濟艱難唯孝元而已功業懋盛前代未聞我與王  
公俱受重寄語未絕音聲猶在耳豈期一旦便有異圖  
嗣主高祖之孫元皇之子海內屬目天下宅心竟有何

幸坐致廢黜遠求夷狄假立非次觀其此情亦可知矣  
乃密具袍數千領及錦綵金銀以為賞賜之具九月壬  
寅高祖召徐度侯安都周文育等謀之仍部列將士分  
賞金帛水路俱進是夜發南徐州討王僧辯甲辰高祖  
步軍至石頭前進遣勇士自城北踰入時僧辯方視事  
外白有兵俄而兵自內出僧辯遽走與其第三子頤相  
遇俱出閣左右尚數十人苦戰高祖大兵尋至僧辯衆  
寡不敵走登城南門樓高祖因風縱火僧辯窮迫乃就

擒是夜縊僧辯及子頽庚午貞陽侯遜位百僚奉晉安  
王上表勸進十月己酉晉安王即位改承聖四年為紹  
泰元年壬子詔授高祖侍中大都督中外諸軍事車騎  
將軍揚南徐二州刺史持節司空班劍鼓吹並如故仍  
詔高祖甲仗百人出入殿省震州刺史杜龕據吳興與  
義興太守韋載同舉兵反高祖命周文育率衆攻載於  
義興龕遣其從弟北叟將兵拒戰北叟敗歸義興二年  
正月癸未誅杜龕於吳興龕從弟北叟司馬沈孝敦並

賜死二月庚申高祖遣侯安都周鐵武率舸艦備江州  
仍頓梁山起柵三月戊戌齊遣水軍儀同蕭軌庫狄伏  
連堯難宗東方老侍中裴英起東廣州刺史獨孤辟惡  
洛州刺史李希光并任約徐嗣徽等率衆十萬出柵口  
向梁山帳內盪主黃叢逆擊敗之燒其前軍船艦齊頓  
軍保蕪湖高祖遣定州刺史沈泰吳郡太守裴忌就侯  
安都共據梁山以禦之四月丁巳高祖詣梁山軍巡撫  
五月甲申齊兵發自蕪湖庚申至秣陵故治高祖遣周

文育屯方山徐度頓馬牧杜稜頓大航南己亥高祖率  
宗室王侯及朝臣將帥於大司馬門外白虎闕下刑牲  
告天以齊人背約發言慷慨涕泗交流同盟皆莫能仰  
視士卒觀者益奮辛丑齊軍於秣陵故縣跨淮立橋柵  
引渡兵馬其夜至方山侯安都周文育徐度等各引兵  
還京師癸卯齊兵自方山進及兒塘游騎至臺周文育  
侯安都頓白土崗旗鼓相望都邑震駭高祖潛撤精兵  
三千配沈泰渡江襲齊行臺趙彥琛於瓜步獲舟艦百

餘艘陳粟萬斛六月甲辰齊兵潛至鍾山龍尾丁未進  
至幕府山高祖命衆軍秣馬蓐食遲明攻之乙卯高祖  
率帳內麾下出幕府山南吳明徹沈泰等衆軍首尾齊  
舉縱兵大戰侯安都自白土崗引兵橫出其後齊師大  
潰斬獲數千人相蹂藉而死者不可勝計生執徐嗣宗  
斬之以徇追奔至於臨沂其江乘攝山鍾山等諸軍相  
次克捷七月庚子詔授高祖中書監司徒揚州刺史進  
爵為公增邑并前五千戶并給油幢皂輪車是月侯瑱

以江州入附遣侯安都鎮上流定南中諸郡八月癸卯  
太府卿何徵新州刺史華念各上玉璽一高祖表以送  
臺詔歸之高祖是日詔高祖食安吉武康二縣合五千  
戶九月進高祖位丞相錄尚書事鎮衛大將軍改刺史  
為牧進封義興郡公丁未中散大夫王彭牋稱今月五  
日平旦於御路見龍迹自大社至象闕亘三四里庚申  
詔追贈高祖考侍中光祿大夫加金章紫綬封義興郡  
公謚曰恭十月甲戌敕丞相自今入問訊可施別榻以

近宸坐二年正月壬寅天子朝萬國於太極東堂詔加  
高祖班劔十人八月甲午進高祖位太傅加黃鉞劔履  
上殿入朝不趨贊拜不名并給羽葆鼓吹一部丙申加  
高祖前後部羽葆鼓吹是時湘州刺史王琳擁兵不應  
命高祖遣周文育侯安都率衆討之九月詔進位相國  
總百揆封十郡為陳公備九錫之禮十月進高祖爵為  
王又命冕十有二旒建天子旌旗辛未梁帝禪位永定  
元年冬十月乙亥高祖即皇帝位於南郊柴燎告天大

赦天下改梁太平二年為永定元年封梁帝為江陰王  
賜民爵二級文武位二等鰥寡孤獨不能自存者人穀  
五斛丙午輿駕幸鍾山祀蔣帝廟戊寅輿駕幸華林園  
親覽詞訟臨赦囚徒己卯分遣大使宣勞四方辛巳追  
尊皇考曰景皇帝廟號太祖皇妣董太夫人曰安皇后  
追謚前夫人錢氏號為昭皇后立夫人章氏為皇后癸  
未尊景帝陵曰瑞陵昭皇后陵曰嘉陵依梁初園陵故  
事立刪定郎治定律令戊子遷景皇帝神主祔於太廟

夏四月興駕親祀太廟乙丑江陰王薨詔遣太宰弔祭  
司空監護喪事凶禮所須隨由備辦以梁武林侯蕭諮  
息李卿嗣為江陰王初侯景之平也火焚太極殿承聖  
中議欲營之獨闕一柱至是有樟木大十二圍長四丈  
五尺流泊陶家後渚監軍鄒子度以聞詔中書令沈眾  
兼起部尚書少府卿蔡儔兼將作大匠起太極殿甲寅  
太極殿成匠各給復十二月甲申侍中安東將軍臨川  
王倩率百僚朝前殿拜上牛酒甲子興駕幸大莊嚴寺

設無量大會捨乘輿法物羣臣備法駕奉迎即日輿駕  
還宮庚寅高祖於太極殿東堂宴羣臣設金石之樂以  
路寢告成也三年春正月己丑青龍見於東方丁酉夜  
大雪及明太極殿前有龍迹見甲午廣州刺史歐陽頎  
表稱白龍見於州江南岸長數十丈仙人見於羅浮山  
寺小石樓長三丈通身潔白衣服楚麗北江州刺史熊  
曇朗殺都督周文育於軍舉兵反王琳遣其將常衆愛  
曹慶率兵援余

視遮切

孝勸六月戊子儀同侯安都敗衆

愛等於左里獲琳從弟襲主帥羊暕音簡等三十餘人衆

愛遁走庚寅廬山民斬之傳首京師甲午衆師凱歸丁

酉高祖不豫遣兼太宰尚書左僕射王通以疾告太廟

兼太宰中書令謝哲告大社南北郊辛丑高祖疾小瘳

故司空周文育之柩至自建昌壬寅高祖素服哭於東

堂哀甚癸卯高祖臨訊獄訟是夜熒惑在天高祖疾又

甚庚午崩於璿璣殿時年五十七遺詔遣臨川王綽入

纂大業遷殯於太極殿西階謚曰武皇帝廟號高祖葬

萬安陵

太平御覽卷一百三十三